

Jonás

Jonás Jehová töywono

1 ¹Domer shäng kjłara ko Jonás, e Amitay wa. Pjłara ga Jehová tjłë ba kong ga ²«Kjok buk kjrina kësbang, kjëryo shäryak ak go pjribri kjókshko ko Nínive. Pja nom eshko. Ga roy sös ba kong ga llëbo owa shärye löng kës li roy kuror, ga epga shdun e kjışhko» le.

³Gueniyo ga kołara Jonásdë llëm, jek Jope kjokyo shara. Öötong shäng eshko ga kjoyong włëna buk kjłara ba brikdo, jongya jong Tarsis kjokyo, Jehová töywe wło le. Eni ga oppotjwłëno, opyono ba roshko, jek äär eshko wło.

⁴⁻⁵Gueniyo ga pjłuk ichara Jehováre dlung kjing kësbang, dbo ara. Eni ga kjoyong sögaga li bë löng dete erä. Wotjłik łok ga kjoyong dlar le, bangkjre łok träk llëm, ga kjłara kjłara kjarga löng syöshtë, kjłoshtë ba sböpga kong. Eshko ga ba kjoyong jer pir llëm wło ga kjoyong roshko llëbo tjeng kës li shira, dbura łok jer dlung roshko.

E wopro ga Jonás beno buk pë dew, kjoyong roshko. ⁶Eni ga kjoyong söga kägäyo jer Jonás bukshko ga tjłë ba kong ga «¿Pja pë kjër ega? ¿Pja kojös maling kjwey dwayo! ¿Pja syöshtos bop sbö kong, shji songe le kjwe, shji wolon llëm wło!» le.

⁷E irgo ga kjoyong sögaga li tjłë łok ëng kong ga «Kjweri, shji llëbo jyägło dbuk, llëbo owa jü łaga ërë iy wělë wło» le. Shäryara łok eni, ga miydara e go ga włoyo Jonásdë.

⁸Eni ga tjłë łok ba kong ga «Łos borwa kong ga ¿llëbo owa tjwe borwa kong ega? ¿Pja pak llë? ¿Pja tek kjone dwayo? ¿Pja kjone so? ¿Pja tjëyo kjone dey?»

⁹⁻¹⁰«Tja hebreo. Jehová, e bangkjrotë. E Sbö, kjok uunkong shäryaga, dlung ëre shäryaga bakoe. Tja ëre to shäng ba töywë» le ba kong.

Kuya łok ga bangkjrara ara, tjłë ba kong ga «¿Shäryëp eni ega?» le.

¹¹Eshko ga dlung poyong dbo kjrë jek këgong këgong, ga tjłë łok ba kong ga «¿Llëye shäryërwa bop tjok, dlung ëre słan ber buk tjëkso wło?»

¹²«Tja dbuzi jer dlung roy, ga dlung kjwe ber buk tjëkso dani. Miydër pjłú ga pjłuk to tek löng kës bi kjing go ëre włoyo tjarë» le.

¹³Eshko ga kjra łara łok dbo go, kjoyong tjye łok pjöshko łara, gueniyo dlung iirkono ara anmoyö kjışhko ga tjye ga äe. ¹⁴Eni ga rokara Jehová kong ga tjłë łok ga «Jehová, tjawa iëp wolon, domer ëre zrörwa kjışhko llëme. Llëbo owa shäryara llëm włeni ga owa ëre iëp ber pjang borwa go llëme. Jehová, llëbo



Jonás dburaba jer dlung roy (Jonás 1.15)

uunkong ère shäryaga li pja» ìe. ¹⁵Lara lõk pjir ga Jonás dbura lõk jer dlung roy, ga dlung kjing shkuno, beno buk tjëkso. ¹⁶Iya lõk ga Jehovah bangkjrara lõk, ga lilebo söra, twara ba kong, ga tjëlökwo lara ba kong jlökoyo bakoe.

¹⁷Gueniyo ga mã dlung roy so ichara Jehovahäre kësbang kjlara, Jonás dwe wlo. Ga Jonás beno sök mã li bö roy dbargwo mya, shkër dbae.

Jonás syöyo

2 ¹Eni ga Jonás sök mã li bö roshkoshko ga syöshtono ba Sbö Jehovah kong. Tjlë ga

² «Jehová, tja woydëshko ga
pja rokoror,
ga tja kar dboryorop.

Tëm dlung dorong dwayo, tja wolon döröshko ga
pja rokoror,
ga tja kurop.

³ Tja ichorop jer dlung dorong,
ga tja popnena dlung mäs lirë.
Ba pjlublün këskes li
to jek bor kjing go.

⁴ Kur ga tja iorop beno sök tjoksa.
Bop u ìn ame loror.

⁵ Tja jnena dlung dyorë uunkong,
tja kjingara dlung rong lirë,
dlung kjlo sho oplgwing jong bor dlu go.

- 6 Tja opłono jer öötong shäng dlung dľupyo jer äärshko.
Kur ga tja shduna, iara beno sök eshko iyado.
Gueniyo ga tja wołontoshko ga tja dörop.
Pja bor Sbö Jehovah.
7 Kur ga tja wołon döřoshko ga
Jehová, pja woyoshroror,
ga bor syö öötong bop shwoy,
öötong bop u jong lishko.
8 Ėye mār sböpga jyāglo go ga
kjimtēp ame.
9 Gueniyo bor tjlōkwo pjłú go ga
lłebo sör, twēr ber bop kong.
Lłeye loror bop kong jlōkoyo li shāryēr eni.
¡Jehová, bor döga li pja eröe!» ĩe.
10 Eni ga mā li ichara Jehovahāř Jonás tjewē dlung kjako.

Nínive sopga, lłebo owa shārye lōng li rayara

3 1E irgo ga Jehovah tjlēno Jonás kong jek obi. Tjlē ga 2«Kjok buk
kjrina kēsbang, kjēryo shāryak ak go pjribri kjókshko ko Nínive. Pja
nom eshko. Ga lłeye lēr bop kong li lēp ba kong eni» ĩe.

3Eni ga Sbö tjlōkwo li kolara, ga to jek Nínive kjokyo. Kjok, e kēsbang,
shji jek u ĩk ba roshko wlo ga woydara dbargwo mya. 4Jonás jęktong
shäng ba roshko dbar kjwara ga tjlē nopga kong ga «Äär dbargwo sak
pkęng (40) ga Nínive kjokyo ěre pjiya Sbörē» ĩe.

5Kuya lok ga tjlōkwo kjrarae. Ga tjlē lok ęng kong ga «Shji iē lłēm Sbö
kong» ĩe. Eshko ga nopga uunkong shwong pjuno shtęgro sē ā włeniyo, ba
woowa li ĩya Sbörē wlo ĩe.

6Roy öötong Nínive so pjłuyo kongshko ga kojono ba sökklo sökshko
dwayo, ga shwong onmo pjłú li skwara, shwong shtęgro sē ā włeniyo pjuna, ga
włoktong sök tōshko bakoe. 7E irgo ga pjłú, ba pjłoyoga, e kjibokwo tono kjwara,
miyde kjok eshko sopga uunkongdē wlo. Kjibokwo li tjlē ga

«Shji iē lłēme. Öng lłē sęy lłēm, kong di twęy lłēm bakoe. 8Shwong
shtęgro sē ā włeniyo, e pjüzĩ, bi woowa li ĩya Sbörē wlo.

Ga pjāy kjłoshtos jlōkoyo Sbö kong. Lłeye owa shāryēmi lōng iyado li
rayozia. Pjāy opshāryē owa, oba zrök, oba shpok, e rayozĩ bakoe. 9Eni włeni
ga Sbö wotjłik li kjłopswē, ba iir li lōya, slōya, ga shji pjiya lłēm kjwe.»

10Ĭya Sbörē ga lłebo owa shārye lōng li rayara kjishko ga epga songe
łara, ga lłeye shārye ba tjok łara li shāryara eshko lłēme.

Jonás iirkono ara

4 1E kjishko ga Jonás iirkono ara, 2ga syōshtono Jehovah kong, tjlē ga «Jehová,
tja kuzong. Tja shäng bor kjokshko obishko ga miydoror ga ěre shāryē jūni,

ga ñoror bop kong pjire. E kjishko ga tja töktong jek Tarsis kjokyo. Miydër ga pja Sbö, pja wopjlu anmoyö, nopga songe lëp ñyado, pja iirkë wlo ga kjange. Nopga shdum lëpshko ga lëbo wlep woydë oblë oblë enido, shdum lëm wlo.

³»Eni ga rokër bop kong ga tja ios wolon jekdo. Tja ber sök së ame dey» ñe.

⁴Kuya ga tjilë ba kong ga «¿Pja iirkë kjweni ga pjilure?» ñe.

⁵Eshko ga Jonás opshino kjok eshko dwayo, jek öötong sök kjok buk dlo wen tëm shwo lëkong. Eshko ga ukwang shäryara kjwara, ga beno sök ba dirko, lëye shäryë kjok buk li tjok ñya wlo.

⁶Eshko ga kji sho iara Sbö Jehovahë wen jong kjlara Jonás kopshko, ber sök wopjlu wlo. Kji sho li kjishko ga Jonás woowa lëme. ⁷Gueniyo wëshko kjok shröngto ga shtätä ichara Sbörë, kji sho li ue wlo, ga sho dano beno drete. ⁸Dlo wenoshko ga pjluk kjlik ichara Sbörë weno jong dlo wen tëm shwo lëkong dwayo, ga dlo jong bek Jonás kä kjing go. Eni kuzong ga kuya mae, wopjir kjoyo, wolon woydë erä. Ga tjilë ga «Tja sök së woydë ame» ñe.

⁹Kuya Sbörë ga tjilë ba kong ga «¿Pja iirkë kji sho dano li kjishko ga pjilure?»

«Ëng. Bor kong ga pjilue. Tja sök ëreshko wolon iirdë» ñe.

¹⁰Kuya ga tjilë ba kong ga «Kji sho kjwe dgaga pjarë lëm, kungga pjarë lëm bakoe. Shkër kjwara ga weno, wëshko ga kjëtonge. Gueniyo ga songe lëp. ¹¹Nínive kjokyora nopga ara, sak dbäw dbäw pjloglo sak dbäw kjingsho sak dbäw dbäw pjloglo sak pjök (120,000) kjinmo. Lëye pjilure, de oware, e miyde lok lëme. Eshko ga öng ara bakoe. ¿Eni ga songe lër lëm sorë?» ñe.